

Broj:
Sarajevo, 10.6.2008. godine

**Z A P I S N I K
2. sjednice Vijeća nacionalnih manjina Bosne i Hercegovine
održane 10.6.2008. godine**

Sjednica je počela u 12 sati.

Sjednicom je predsjedavao Nedžad Jusić, predsjedavajući Vijeća.

Sjednici su prisustvovali: Marija Grbić, Vasilija Ibrahimagić, Jovanka Manzalović Šalaka, Milivojević Iren, Jakob Finci, Darko Kovč, Halil Bicaj, Tihomir Knežiček i Andrija Svatok.

Sjednici su također prisustvovali: Emina Jahić – Sekretar Zajedničke komisije za ljudska prava, prava djeteta, mlade, imigraciju, izbjeglice, azil i etiku PSBiH i Dervo Sejdić – OSCE.

Predsjedavajući Vijeća Nedžad Jusić, nakon što je pozdravio prisutne, otvorio je raspravu o predloženom Dnevnom redu.

Za sjednicu je predložen i prihvaćen sljedeći

DNEVNI RED

1. Usvajanje Poslovnika o radu Vijeća nacionalnih manjina BiH;
2. Razmatranje Prijedloga finansijskog plan Vijeća za 2008. godinu;
3. Razmatranje Prijedloga programa rada za 2008. godinu;
4. Razmatranje dopisa upućenog od OSCE-a;

Ad. 1. Usvajanje Poslovnika o radu Vijeća nacionalnih manjina BiH;

Predsjedavajući Vijeća Nedžad Jusić, rekao je da je gospođa Emina Jahić Sekretar Zajedničke komisije za ljudska prava, prava djeteta, mlade, imigraciju, izbjeglice, azil i etiku PSBiH (u daljnjem tekstu: Zajednička komisija) uradila Prijedlog Poslovnika o radu Vijeća nacionalnih manjina BiH (u daljnjem tekstu: Poslovnik o radu).

Sekretar Zajedničke komisije Emina Jahić, istakla je da Odluka o osnivanju Vijeća predviđa da će ovo tijelo svoj ustroj, način rada i druga pitanja utvrditi sa posebnim unutarnjim aktom koje će Vijeće usvojiti, uz saglasnost Parlamentarne skupštine BiH. Shodno navedenom, tekst Prijedloga Poslovnika o radu definiše način rada, sjedište i organizaciju, Prijedlog poslovnika je samo predmet razmatranja ali ne i usvajanja, isti će razmatrati Zajednička komisija za ljudska prava, prava djeteta, mlade, imigraciju, izbjeglice, azil i etiku PSBiH i Kolegij Parlamentarne skupštine BiH, nakon čega biti upućen na davanje saglasnosti od strane Predstavničkog doma i Doma naroda. **Sekretar Zajedničke komisije Emina Jahić**, dodala je da osnov za donošenje Poslovnika o radu čine Odluka o osnivanju nacionalnih manjina i Zakon o zaštiti prava pripadnika nacionalnih manjina BiH, u kojima su precizirani zadaci i dužnosti Vijeća.

Predsjedavajući Vijeća Nedžad Jusić, istakao je potrebu da Vijeće vrši uticaj na sve nacionalne manjine koje nisu organizovane i nemaju svoje predstavnike u Vijeću, poput Crnogoraca i Rumuna, kako bi u što kraćem vremenskom periodu izvršili kandidaturu svojih predstavnika u Vijeće.

Darko Kovč, ukazao je na mogućnosti da se na nivou Federacije BiH oformi Vijeće nacionalnih manjina, reguliše zakonska regulativa i ostvari saradnja između Federacije BiH i Republike Srpske po pitanju ostvarivanja i zaštite prava nacionalnih manjina. **Kovč** je dodao da je dužnost Vijeća da utiče na lokalne zajednice da informišu pripadnike nacionalnih manjina o tome da imaju pravo da se organizuju kao i određena druga prava koja se tiču nacionalnih manjina.

Jakob Finci, obrazložio je da član 20. Zakona o zaštiti prava pripadnika nacionalnih manjina BiH govori o predstavnicima nacionalnih manjina u strukturama vlast koji predstavljaju sve nacionalne manjine i dužni su štiti interese svih nacionalnih manjina u BiH.

Predsjedavajući Vijeća Nedžad Jusić, predložio je da Vijeće uputi dopis Sekretarijatu Parlamentarne Skupštine BiH kojim se zahtijeva odobrenje prostorija neophodnih za rad Vijeća.

Sekretar Zajedničke komisije Emina Jahić, rekla je da je dužnost Vijeća da predloži Prijedlog budžeta za 2008. godinu, koji će biti razmatran pred Zajedničkom komisijom nakon čega će biti razmatran od strane Kolegija i proslijeđen nadležnoj Zajedničkoj komisiji za administrativne poslove. Prijedlog za finansiranje Vijeća dolazi naknadno i polovinom tekuće 2008. godine, njegovo finansiranje može biti odobreno iz sredstava rezervi a zahtijev za finansiranje Vijeća za 2009. Godinu treba biti podnjet blagovremeno kako bi mogao biti uvršten u Prijedlog budžeta za 2009. godinu. Prijedlog za odobrenje prostorija za rad Vijeća je, takođe, neophodno uputiti Zajedničkoj komisiji koja će zahtijev nakon razmatranja proslijediti Kolegiju. **Sekretar Zajedničke komisije Emina Jahić**, predložila je da se u članu 5. teksta Prijedloga poslovnika stav 2. brišu riječi „Komisija za ljudska prava oba doma PSBiH“ i zamijene riječima „Zajednička komisija za ljudska prava, prava djeteta, mlade, imigraciju, izbjeglice, azil i etiku PSBiH“.

Tihomir Knežiček, istakao je da se ne slaže sa prijedlogom da neformalne grupe ne mogu imati podršku Vijeća i dodao da ne vidi razloge zašto Vijeće ne bi moglo vršiti uticaj na nacionalne manjine, koje nisu kandidovale članove za Vijeće, da to i učine.

Predsjedavajući Vijeća Nedžad Jusić, obrazložio je da će Vijeće poticati uključivanje svih 17. nacionalnih manjine u skladu sa Zakonom i predložio da se u članu 5. teksta Prijedloga poslovnika briše dio gdje stoji da Vijeće daje mišljenje i preporuke za imenovanje pripadnika nacionalnih manjina u upravna tijela javnih institucija u BiH, tamo gdje je predviđeno imenovanje članova iz reda ostalih.

Andrija Svatok, rekao je da smatra da u BiH nije riješeno pitanje ko može predložiti nacionalne manjine bilo gdje i u bilo koju instituciju.

Jakob Finci, obrazložio je da manjine predlažu same sebe, kao što to čine i konstitutivni narodi u BiH. **Finci** je predložio da se u tekstu Prijedloga poslovnika u članu 6. stavu 1., briše riječ „svake“.

Sekretar Zajedničke komisije Emina Jahić, objasnila je da je Odluka o imenovanju članova Vijeća „Službeni glasnik BiH broj 15/08“ trenutno na snazi. Vijeće može predložiti da se izvrši izmjena Odluke o imenovanju Parlamentarnoj Skupštini BiH koja prijedlog može usvojiti ili odbiti.

Predsjedavajući Vijeća Nedžad Jusić, konstatovao je da je PSBiH Odluku o formiranju Vijeća donijela 2006. godine a imenovanje članova je nastalo 2008. godine. **Jusić** je zamolio Sekretara Eminu Jahić da pojasni pitanje trajanja mandata članova Vijeća.

Sekretar Zajedničke komisije Emina Jahić, obrazložila je da mandat članova Vijeća traje četiri godine od dana objave Odluke o imenovanju članova Vijeća („Službeni glasnik BiH“, broj 15/08).

Jovanka Manzalović Šalak, istakla je da će, prema neformalnim informacijama, udruženja nacionalnih manjina biti dužna u svoje statute o radu ugraditi odredbe koje određuju ko može biti član Vijeća nacionalnih manjina BiH.

Predsjedavajući Vijeća Nedžad Jusić, predložio je da se prihvati prijedlog Jakoba Fincija vezano za član 10. teksta Prijedloga poslovnika, gdje se predviđa da se sjednica Vijeća saziva najmanje jedanput u dva mjeseca, kao i to da se u članu 6. stav 2. brišu riječi „imenovala je Vijeće od deset članova“.

Vijeće je jednoglasno usvojilo navedene prijedloge kao i Prijedlog Poslovnika o radu Vijeća nacionalnih manjina BiH.

Ad. 2. Razmatranje Prijedloga finansijskog plan Vijeća za 2008. godinu;

Predsjedavajući Vijeća Nedžad Jusić, obrazložio je da je Vijeće dužno predložiti finansijski plan Vijeća za 2008. godinu.

Sekretar Zajedničke komisije Emina Jahić, istakla je da je Sekretarijat PSBiH uputio sugestije kojima se obavještava Vijeće da se sredstva za rad Vijeća omogućavaju iz budžeta institucija BiH a troškove rada Vijeća utvrđuju nadležne Komisije oba doma, Parlamentarna skupština BiH neće finansirati rad udruženja ili fondacija nacionalnih manjina.

Predsjedavajući Vijeća Nedžad Jusić, rekao je da je Tihomir Knežiček predložio da pokrivanje operativnih troškova za rad svakog pojedinca člana Vijeća bude iznos od 300 KM po osobi, što se odnosi na putne troškove i dnevnice.

Sekretar Zajedničke komisije Emina Jahić, obrazložila je da je Vijeće posebno savjetodavno tijelo Parlamentarne Skupštine BiH, za razliku od Komisija koje su radna tijela čiji su članovi poslanici i delagati PSBiH, shodno tome, način finansiranja Vijeća i Komisija se razlikuje.

Jakob Finci, predložio je da se u Finansijski plan rada unese okvirnih 50.000 KM, koliko bi se orijentaciono odobrilo za rad Vijeća za 2008. godinu, što bi podrazumijevalo troškove za paušal, naknadu za rad, troškove korištenja telefona, putne troškove, troškove smještaja i sve druge materijalne troškove. Pored navedenog u Prijedlog budžeta u okviru 50.000 KM je potrebno predvidjeti odvajanje 6.000 KM za studijsku posjetu i 5.000 do 10.000 KM za provedbu okruglog stola.

Predsjedavajući Vijeća Nedžad Jusić, predložio je da Vijeće usvoji zaključak kojim se predlaže da paušal po svakom članu Vijeća iznosi oko 300 KM a da se odobri iznos u visini od 300 KM za putne troškove i troškove smještaja za članove koji nisu iz Sarajeva, 10.000 KM za troškove održavanja okruglog stola i 6.000 KM za troškove studijske posjete.

Vijeće je jednoglasno prihvatila navedeni zaključak.

Ad. 3. Razmatranje Prijedloga programa rada za 2008. godinu;

Predsjedavajući Vijeća Nedžad Jusić, rekao je da je Vijeće tijelo koje vrši monitoring Akcionog plana za obrazovne potrebe Roma i ostalih nacionalnih manjina u BiH te shodno tome predložio da se u mjesecu septembru 2008. godine izvrše posjete ministarstvima obrazovanje u kantonima FBiH i Republici Srpskoj kako bi se stekao uvid u stanje provedbe navedenog Akcionog plana. **Jusić** je dodao da smatra neophodnim da Vijeće bude organizator okruglog stola na temu „Položaj nacionalnih manjina u BiH“ na koji bi bili pozvani predstavnici nacionalnih manjina i sve relevantne institucije i organizacije koje mogu dati doprinos u sagledavanju trenutnog stanja i položaja nacionalnih manjina u BiH. U mjesecu novemru i decembru je neophodno pokrenuti pripremu Programa rada i finansijskog plana rad za 2009. godinu. **Jusić** je predložio da svi članovi Vijeća putem e-mail pošte dostave prijedlog za finansiranje Vijeća za 2008. godinu kao i Prijedlog plana rada Vijeća za 2008. godinu.

Ad. 4. Razmatranje dopisa upućenog od OSCE-a;

Predsjedavajući Vijeća Nedžad Jusić, dao je riječ predstavniku OSCE-a gospodinu Dervi Sejdiću.

Dervo Sejdić, rekao je da će OSCE organizovati Radionicu o ljudskim pravima koja će biti održana 26. i 27. 2008. godine u Hotelu Sunce u Vogošći. Radionica ima za cilj jačanje kapaciteta Vijeća nacionalnih manjina u okviru koje će stručni eksperti dati pregled domaće i strane zakonske regulative po pitanju zaštite prava nacionalnih manjina, kao i pregled međunarodnih standarda, predviđeno je i obrazlaganje metodologija o načinu saradnje Vijeća sa udruženjima nacionalnih manjina u BiH, kao i mogućnost ostvarivanja saradnje sa entitetskim vijećima nacionalnih manjina. **Sejdić** je istakao da na ovaj način OSCE misija u BiH želi pružiti podršku i pomoć u radu Vijeća.

Predsjedavajući Vijeća Nedžad Jusić, istakao je da će navedena radionica biti od značajne koristi za sve članove Vijeća. **Jusić** je informisao prisutne da su do danas prijavljena 34. nezavisna kandidata za opštinske izbore u BiH, kao predstavnici nacionalnih manjina, u određenim opštinama su kandidovana dva do tri kandidata a predviđeno je jedno mjesto, dok su neke opštine predviđaju nekoliko mjesta ali nema prijavljenih kandidata. **Jusić** je istakao i neophodnost da se u narednom vremenskom periodu razmotri mogućnost izmjene Izbornog zakona BiH.

Vijeće je navedene informacije primilo k znanju.

Sjednica Vijeća je završena u 13,30 sati.

**Predsjedavajući Vijeća
Nedžad Jusić**

